

**Uunga siunnersuut: Sumiiffinni immikkut toqqakkani takornariartitsisarnernut  
akuersissuteqartarneq pillugu Inatsisartut inatsisaat**  
*Inuutissarsiornermut, Niuernermut, Aatsitassanut, Inatsisit Atuutsinneqarnerannut  
Naligiissitaanermullu Naalakkersuisumit saqqummiunneqartoq*

**pillugu**

**Inuussutissarsiornermut Aatsitassanullu Ataatsimiititaliap**

**siunnersuutip pingajussaaneerpeqarneranut**

**ILASSUTITUT ISUMALIUTISSIISSUTAA**

Ataatsimiititaliap suliarinninnermini [kingullermik] ilaasortarai:

Inatsisartunut ilaasortaq Karl Tobiassen, Siumut, Siulittaasoq  
Inatsisartunut ilaasortaq Bentiarq Ottosen, Atassut, Siulittaasup tullia  
Inatsisartunut ilaasortaq Kristian Jeremiassen, Inuit Ataqtigiit,  
Inatsisartunut ilaasortaq Mariane Paviassen Jensen, Inuit Ataqtigiit  
Inatsisartunut ilaasortaq Lars Poulsen, Siumut  
Inatsisartunut ilaasortaq Kuno Fencker, Siumut  
Inatsisartunut ilaasortaq Pele Broberg, Naleraq

Ataatsimiititaliap UKA 2024-p ingerlanerani oktobarip ulluisa 15-ianni  
aappassaaneerinninnerup kingorna siunnersuut misissuataarpaa.

**Siunnersuutip imarisai siunertaalu**

Siunnersuutip imarisai siunertaalu eqqarsaatigalugit siunnersuutip aappassaaneerpeqarneranut  
ataatsimiititaliap isumaliutissiissutaa innersuussutigineqarpoq.

**Siunnersuutip Inatsisartuni aappassaaneerpeqarnera**

Siunnersuut aappassaaneerinninnermi akuersissutigineqarpoq siunnersuutip  
aappassaaneerpeqarneranut Naalakkersuisut allannguutissatut siunnersuutaat ilanngullugit  
akuersissutigineqarlutik.

Ataatsimiititaliami amerlanerussuteqartut Inuit Ataqtigiit, Siumup Atassutillu  
ilaasortaataa peqatigitillugu Inatsisartut inatsisissaattut siunnersuutip kalaallisuuta  
qallunaatuuatalu imminnut naapertuunnissat qularnaarniarlugu allannguutissatut  
siunnersuuteqaqqeqqullugit Naalakkersuisunut kaammattuutigaat.

Siunnersuut ataatsimiititaliap kissaateqarnera tunngavigalugu Inuussutissarsiornermut Aatsitassanullu Ataatsimiititaliamut suliarineqartussanngorteqqinneqarpoq.

### **Sassartitsinerit**

Ataatsimiititaliaq siunnersuutip matuma suliarineqarneranut atatillugu Ilulissat Excursionsimit aallartitanik ataatsimeeqateqarpoq.

### **Saaffiginnissut**

Ataatsimiititaliaq novembarip ulluisa 18-ianni Sulisitsisunit saaffiginnissummik tigusaqarpoq. Ataatsimiititaliaq saaffiginnissummumut qujarusuppoq, piffissaalatsinerli pissutigalugu saaffiginnissut siunnersuutip suliarineqarnerani isummerfigineqarsinnaasimangilaq.

### **Ataatsimiititaliap siunnersuummik suliarinninnera**

Inatsisartut inatsisaata kalaallisuuata qallunaatuuatalugu imminnut naapertuunnissaat qularnaarniarlugu ataatsimiititaliami amerlanerussuteqartut kaammattuutaat Naalakkersuisut tusaaniarsimavaat. Ataatsimiititaliami amerlanerussuteqartut tamatumunnga Naalakkersuisunut qujassuteqarput.

Aappassaaneerinninnissamut ataatsimiititaliap isumaliutissiissutaani nalunaarutigineqartutut ataatsimiititaliami amerlanerussuteqartut taamaattoq inatsisissatut siunnersuummi sulii allanngortitsisoqarnissaa pisariaqartissimavaat.

Taamaattumik ataatsimiititaliami amerlanerussuteqartutut Inuit Ataqatigiit, Siumup Atassutillu ilaasortaatitaasa allannguutissatut siunnersuummut allannguutissatut siunnersuuteqarput.

Allannguutissatut siunnersuummut allannguutissatut siunnersuut inatsisissatut siunnersuummi § 27, imm. 1-ip oqaasertalerneqarneranut tunngavoq. Tassuuna inatsisitigut tunngavissiisoqarpoq inatsisissatut siunnersuummi aalajangersakkat arlallit unioqquinneqarnerinut akiliisitsinermik pineqaatissiisinaanissamut.

Allannguutissatut siunnersuummut allannguutissatut siunnersuutip kingunerissavaa aalajangersakkanik pineqartunik unioqquitsinerit akiliisitaanermik pineqaatissiisutaasinnaassammata, aamma unioqquitsineq mianersuaalliornerinnakkut pisimagaluarpat.

Allannguutissatut siunnersuummut allannguutissatut siunnersuut taamaalilluni allannguutissatut siunnersuummi § 27-mit assigiinngissuteqarpoq, taannami malillugu taamaallaat piaaraluni mianersuaalliorujussuarluniluunniit unioqquitsinerit akiliisitaanermik pineqaatissinneqarsinnaammata.

Aalajangersakkat pineqaatissartallit malinneqarnissaasa sakkortusarneqarnissaat taamaaliornikkut siunertarineqarpoq.

**Ataatsimiititaliap inassuteqaatai**

1. Ataatsimiititaliami amerlanerussuteqartut Inuit Ataqtigiit, Siumup Atassutillu ilaasortaataitaat taamaattumik allannguutissatut siunnersuummut allannguutissatut siunnersuuteqarput
2. Ataatsimiititaliami amerlanerussuteqartut Inuit Ataqtigiit, Siumup Atassutillu ilaasortaataitaasa piginnittusaaanermut piunasaqaatip sakkortusineqarnissaanik Naalakkersuisunut kaammattuuteqarput, taamaalilluni Naalakkersuisut nunatta immikkoortuini sumiiffinni aalajangersimasuni inuit inatsisilerinikkullu inuttut isigineqarsinnaasut (ass. ingerlatseqatigiiffiit) suliffeqarfinni aalajangersimasumik annertussusilimmik piginneqataassuteqartarnissaanik Naalakkersuisut piunasaqaatinik aalajangersaasannaangortillugit, najukkani soqutigisat illersorniarlugit najukkaniillu piginnittuunissaq qularnaarniarlugit tamanna pisariaqartutut isigineqaraangat. Piginneqataassuteqarnerup minnerpaaffissaa najukkanit piginnittuuneq illersorniarlugu 2/3-mut aalajangersarneqartariaqarpoq.
3. Ataatsimiititaliami amerlanerussuteqartut Inuit Ataqtigiit, Siumup Atassutillu ilaasortaataitaasa Naalakkersuisunut kaammattuutigaat § 10-mi piunasaqaammik ilanngusseqqullugit Kalaallit Nunaanni najukkani suliffeqarfiit salliutinneqartussanngortillugit, minnerpaamik piunasaqaatit tamarmik naammassineqarsimappata. Taamaaliornikkut suliffeqarfiit nunatta avataaneersut akuersissutinik pissarsinnaaneratt annikillisinneqarsinnaavoq.
4. Ataatsimiititaliami amerlanerussuteqartut Inuit Ataqtigiit, Siumup Atassutillu ilaasortaataitaasa Naalakkersuisunut kaammattuutigaat § 16 sakkortusineqaqqullugu najukkani sulisunik pilersuisunillu atuinissaq periarfissaannaanani pinngitsoorani malinneqartussanngorlugu. Piunasaqaammut tamatumunnga najukkani sulisunik atorfinitsitsisarnissanut pilersuisunillu Kalaallit Nunaannersunik isumaqatigiissuteqartarnissamut procentimik minnerpaaffissamik aalajangersaasoqarnissaa ilaasariaqarpoq.
5. Ataatsimiititaliami amerlanerussuteqartut Inuit Ataqtigiit, Siumup Atassutillu ilaasortaataitaasa Naalakkersuisunut kaammattuutigaat § 4, imm. 3 sakkortusineqaqqullugu, pinsinnaatitsissutinik pigisaqartut akuersissutinik suliffeqarfinnut nunanit allaneersunut tunniussisinnaanerannik mattussisumik. Kalaallit Nunaanni najukkani ingerlatseqatigiiffinnut inunnulluunniit tunniussinissaq taamaallaat periarfissaasariaqarpoq.
6. Ataatsimiititaliami amerlanerussuteqartut Inuit Ataqtigiit, Siumup Atassutillu ilaasortaataitaasa Naalakkersuisunut kaammattuutigaat ingerlatseqatigiiffik nunanit allaneersoq akuersissummik tunineqassappat, taava piffissaq akuersissuteqarfiusoq sivilunerpaamik ukiunut tallimanut-qulinut sivilillineqaqqullugu qinnuteqaqqittarnissarlu piunasaqaatigalugu. Taamaaliornikkut siunertarineqarpoq najukkanit aallaaveqarnerup akulikinnerusumik nakkutigineqarlunilu nalilersorneqartarnissaata qularnaarneqarnissaa.

Allatigut

Takornariartitsisarnermik inuussutissarsiuqarnerup najukkanit aallaaveqarnissaa qularnaarniarlugu Naalakkersuisut ingerlaavartumik suliaqarnissaat ataatsimiititaliap pingaartutut isigivaa. Inatsisit allat najukkani ingerlataqartut illersorneqarnerinut sunniuteqarsinnaasut nutarterneqarnissaat Naalakkersuisut isumaliutigissagaat ataatsimiititaliap ilanngullugu kaammattuutigaa. Tamatumani minnerunngitsumik akileraartarnermut inatsiseqartitsinermi malittarisassat, ingerlatseqatigiiffiit iluini niueqatigiinnermut akigitinneqartartut (transferpricing) sakkortusineqarnissaat ilanngullugu, eqqarsaatigineqarput.

Taamatut oqaaseqarluni isumaliutissiisummillu allassimasutut paasinnilluni ataatsimiititaliap siunnersuut pingajussaaniigassanngortippaa.

---

Karl Tobiassen  
Siulittaasoq

---

Bentiarq Ottosen  
Siulittaasup tullia

---

Mariane Paviasen Jensen

---

Kristian Jeremiassen

---

Lars Poulsen

---

Kuno Fencker

---

Pele Broberg